

廿二史考異

金史二

廿二史攷異八十五

錢大昕學

宗室表

大定以前稱宗室明昌以後稱內族其實一而已書名不書氏其制如此宣宗詔宗室皆稱完顏不復識別焉 按熙宗海陵世宗章宗紀中宗室皆不書氏其稱完顏者若婁室若希尹若謀衍若守道守能守貞皆異姓也銀术可史稱宗室子而與其子穀英皆稱氏若思敬若布輝若匡皆始祖之系而亦稱氏則以屬疏稍示區別也宣宗以後內族亦稱完顏且有以

漢人而賜國姓者由是同異姓遂溷而莫辨矣

貞祐以後譜牒散失大槩僅存不可殫悉今掇其可次

第者著於篇 按表所載世系尚有脫漏如秉德有

弟特里弘里

見秉德傳后妃傳

庶頗之後有埽合埽合子撒

合輦撒合輦子惟鎔惟鎔子從傑

見撒合輦傳

烏帶之子

兀荅補孫塘

見本傳

撒八之子賽里

見幹魯傳

宗強孫思烈

夾子見太祖諸子傳

胙王元之子育

見元傳

宗本子莎魯刺宗固

子胡里刺

見后妃傳

南陽郡王襄之子思烈

見思烈傳

表皆失

書

宗亨

按宗亨宗賢宗憲宗尹宗雋宗傑宗強宗敏宗

原缺

事王次翁副使德慶軍節度使錢恂

表於宋使姓名多闕漏宋史本

紀但有正使名而不書官職惟繫年錄所載甚備今取以補表之闕

又案是年宋參知

政事万俟卨爲報謝使榮州防禦使邢孝揚副之表
失載

三年正月己丑朔宋使賀正旦 正使中書舍人楊愿

副使宣州觀察使何彥良

乙巳宋使賀萬壽節

正使戶部侍郎假禮部尚書沈

昭遠

宋史沈作審

副使福州觀察使王公亮李心傳云金

主賈以七夕日生以其國忌故錫宴諸路用次日朝廷每遣使金人循契丹舊例不欲兩接使人因就以

正月受禮自此歲以爲常此事金史失書又是年冬
金始遣右宣徽使完顏華祕書少監馬諤賀宋正旦
表失書

四年正月癸卯朔宋使賀正旦 正使權兵部侍郎鄭
朴副使保順軍承宣使何彥良

己巳宋使賀萬壽節 正使權工部侍郎王師心副使
解州防禦使康益又是年正月宋遣吏部尚書羅汝
機鎮東軍承宣使鄭藻爲報謝使

謝金使
賀正旦

其夏金始

遣安國軍節度使烏延和大理少卿孟浩賀宋生辰
宋又遣吏部侍郎假吏部尚書陳康伯嘉州防禦使

假保信軍承宣使錢愷報謝其冬金遣殿前右副都點檢李散溫東上閤門使高慶先賀宋正旦表皆失書

五年正月丁未朔宋使賀正旦 正使權吏部侍郎林保副使知閤門事康益

癸亥宋使賀萬壽節 正使權禮部侍郎宋之才副使閤門宣贊舍人趙瓌其夏金遣殿前左副都點檢完顏宗尹翰林待制程案賀宋生辰其冬金遣殿前右副都點檢蒲察說刑部侍郎吳磐福賀宋正旦

六年正月辛未朔宋使賀正旦 正使權刑部侍郎錢

周材副使閤門祇候俞似

丁亥宋使賀萬壽節 正使權工部侍郎嚴抑閤門祇

候曹湊其夏金遣彰德軍節度使烏古論海同知宣
徽院事趙興祥賀宋生辰其冬金遣會寧尹盧彥論
四方館使張仙壽賀宋正旦又是歲九月宋又遣端
明殿學士何鑄賓德軍節度使邢孝揚爲祈請使

七年正月乙丑朔宋使賀正旦 正使權戶部侍郎邊
知白副使閤門宣贊舍人孟思恭

辛巳宋使賀萬壽節 正使權禮部侍郎周執羔知閤
門使宋錢孫其夏金遣殿前右副都點檢完顏卞東

上閣門使大蛙賀宋生辰其冬金遣殿前左副都點
檢完顏宗藩東上閣門使吳前範賀宋正旦

八年正月庚申朔宋使賀正旦 正使禮部侍郎沈該
副使閤門宣贊舍人蘇華

丙子宋使賀萬壽節 正使工部尚書詹大方副使閤
門宣贊舍人容肅其夏金遣會寧尹蕭秉溫東上閤
門使申奉顏賀宋生辰其冬金遣殿前右副都點檢
召守忠同知宣徽院事劉君詔賀宋正旦

九年正月甲申朔宋使賀正旦 正使起居舍人王墨
卿副使惠州刺史蘇華

庚子宋使賀萬壽節 正使權禮部侍郎陳誠之副使

吉州刺史孟思恭其夏金遣殿前左副都點檢唐括

德溫四方館使高居安賀宋生辰其冬金遣殿前右

副都點檢完顏充西上閣門使劉箴賀宋正旦

天德元年十二月宋賀正旦使至廣寧遣人諭以廢立

之故於中路遣還 按是歲卽皇統九年宋紹興二

十年也宋所遣賀正旦使副則太常少卿張杞和州

團練使趙述賀生辰使副則司農卿湯鵬舉吉州刺

史石靖也賀生辰使當同時遣還史文不具耳

二年二月甲子以兵部尚書完顏元宜修起居注高懷

貞爲賀生辰使 表書賀宋生辰始於此繫年錄紹
興二十一年五月甲午金國賀生辰使副侍衛馬步
軍都指揮使完顏思恭翰林直學士翟永固見於紫
宸殿思恭等來報亮代立旣出境就遣來賀與表互
異恐當以表爲正

三月丙戌宋參知政事余唐弼 宋史及繫年錄俱作
余堯弼此作唐蓋金史臣避世宗父諱追改之是冬
金遣祕書監左諫議大夫蕭頤翰林待制王兢賀宋
正旦

三年正月癸酉朔宋使賀正旦 正使權禮部侍郎陳

誠之副使均州觀察使錢愷尚有賀生辰正使起居舍人兼權直學士院王曦副使和州團練使趙述表於是年失書宋使賀生辰一節

三月少府監耶律五哥 繫年錄作耶律夔官名亦異大率金人多兩名表所載者本名奉使則別有漢名耳

六月宋使奉表祈請山林地不許 正使簽書樞密院事巫伋副使保信軍節度使鄭藻

十月以右副點檢不朮魯阿海 宋史繫年錄俱作兀朮魯定方

四年正月丁酉朔宋使賀正旦 正使中書門下省檢

正諸房公事陳夔副使惠州刺史蘇華

壬子宋使賀生辰 正使樞密院檢詳文字陳相副使
吉州刺史孟思恭

十月以太子詹事張用直左司郎中溫都幹帶爲賀宋
正旦使十二月以張用直卒改遣南京路都轉運使
左瀛爲賀宋正旦使 按繫年錄是年十二月金主
使太子詹事張利用尚書兵部郎中兼四方館副使
耨盪溫都子敬來賀明年正旦利用與用直當卽一
人而不言改遣左瀛殆以國書不及改易故因而書

之耳

宋史亦書
張利用

貞元元年正月以皇弟充藪不視朝命有司受宋貢獻

是年宋賀正旦正使權國子司業孫仲鼇副使閤

門宣贊舍人陳靖賀生辰正使吏部員外郎李琳副

使忠州防禦使石靖

宋史紹興二十二年失
書遣孫仲鼇李琳事

四月以右宣徽使紇石烈撒合輦 宋史及繫年錄作

紇石烈大雅

十一月右司郎中婁室 繫年錄作紇石烈師顏

二年正月甲寅朔以疾不視朝宋使就館燕 正使中

書門下省檢正諸房公事施鉅副使帶御器械冀彥

明

宋史云吳巢賀正旦施鉅賀生辰與繫年錄互異

己巳宋使賀生辰 正使左司郎中吳巢副使閣門宣

贊舍人張彥攸

十月以刑部侍郎白彥恭爲賀宋正旦使 副使翰林

待制胡勵

十二月丁未宋使貢方物 宋史及繫年錄俱無遣使

事殆卽賀正旦生辰禮物

三年正月己酉朔宋使賀正旦 正使國子司業沈虛

中副使敦武郎張掄

甲子宋使賀生辰 正使左司郎中張士襄副使閣門

宣贊舍人張說

十月翰林學士承旨耶律歸一爲賀宋正旦使 副使

大理少卿馬楓

正隆元年正月癸卯朔宋使賀正旦 正使禮部侍郎

王珉副使閣門宣贊舍人王漢臣

戊午宋使賀生辰 正使宗正丞鄭柟副使閣門宣贊

舍人李大授是歲四月宋遣翰林學士陳誠之假崇

信軍節度領閣門事蘇華爲賀尊號使表失書

十一月以右司郎中梁鉞左將軍耶律湛 繫年錄鉞

作球湛作謚金無左將軍之官錄作定遠大將軍當

從之

二年正月戊辰朔宋使賀正旦 正使宗正少卿李琳
副使侍衛馬軍司幹辦公事宋均

癸未宋使賀生辰 正使左司郎中葛立方閣門宣贊
舍人梁份

十一月侍衛親軍馬步軍副都指揮使高助不古戶部
侍郎阿勒根宥產 繫年錄作高思廉

宋史同

阿勒根

彥忠

三年正月壬戌朔宋使孫道夫賀正旦 道夫時官太
常少卿副使則閣門宣贊舍人鄭朋也

丁丑宋使賀生辰 正使起居郎劉章副使閣門宣贊

舍人□邦傑

十一月吏部侍郎阿典和實懣 繫年錄作阿典謙

四年正月丙辰朔宋使賀正旦 正使祕書少監沈介

副使閣門祇候宋直溫

辛未宋使賀生辰 正使國子司業黃中副使閣門祇

候李景夏

十月宋使上表謝賜戒諭 繫年錄紹興二十九年

正

隆四 九月乙酉奉使大金稱謝使同知樞密院事王

綸副使昭信軍節度使曹勛等還朝入見當卽此事

然綸等於九月還臨安其在金上表必更在其前不當係於十月

十一月宿州防禦使耶律闌里刺 繫年錄作耶律翼
十二月宋使來告其母韋氏哀 正使翰林學士周麟
之副使吉州國練使知閣門事蘇華

五年正月庚辰朔宋使賀正旦 正使起居舍人楊邦
弼副使榮州刺史張說

乙未宋使賀生辰 正使太府卿李潤副使閣門宣贊
舍人張安世

二月宋參知政事賀允中等爲韋后遺獻使 副使保

信軍節度使鄭藻

四月宋使葉義問等來謝弔祭 義問時爲同知樞密院事副使則和州防禦使劉允升也是歲金遣殿前右副都點檢蕭榮太子右諭德張忠輔賀宋生辰表亦失之

十一月以濟南尹僕散烏者 宋史及繫年錄作僕散權

六年正月甲戌朔宋使賀正旦 正使起居舍人虞允文副使知閣門事孟思恭

己丑宋使賀生辰 正使樞密院檢詳文字徐度副使

帶御器械王謙是歲七月宋遣樞密都承旨假資政
殿大學士徐嘉文州刺史知閤門事張掄賀遷都至
盱眙金遣翰林侍講學士韓汝嘉宣諭止之自是使
命遂絕

四月以簽書樞密院事高景山爲賀宋生日使 副使
刑部侍郎王全

大定二年六月宋翰林學士洪邁鎮東軍節度使張掄
賀上 是時邁官起居舍人掄知閤門事表所載皆
假官也

五年十一月以殿前右副都點檢烏古論粘沒曷 宋

史作烏古論忠弼

七年 是歲遣徒單忠衛等爲賀宋正旦使表失書

八年十一月以同僉太宗正事宗室闊合土 宋史作

完顏仲仁

十年十一月以太子詹事蒲察速越 宋史作蒲察愿

十五年 據宋史前年

淳熙元年

十二月遣吳琚等賀金主

生辰此表不書宋使賀萬春節何也

九月以歸德尹完顏王祥 宋史作完顏禧

十一月以右宣徽使宗室靖 宋史作完顏迨

十七年九月以殿前右副都點檢完顏習尼烈 宋史

作完顏忠

十一月以延安尹完顏蒲剌觀 宋史作完顏炳

十八年十一月以靜難軍節度使烏延查剌 宋史作

烏延察

二十一年八月以殿前右副點檢宗室胡什賚 宋史

作完顏寔又是歲遣魏貞吉等賀宋明年正旦表及

本紀俱失之

二十二年三月辛未朔宋使賀萬春節 按宋史前年

十月遣施師點等使金賀正旦十一月遣燕世良賀

金主生辰此表不書賀正旦事而賀萬春節使副姓

名亦失之攷本紀亦闕前年九月至本年二月事

九月以殿前左衛將軍宗室禪赤 宋史作完顏宗回

十一月以昭毅大將軍孛朮魯罕 世宗紀作孛朮魯

阿魯罕表脫阿魯二字宋史作孛朮魯正

二十五年十一月以臨潢尹僕散守中 宋史中作忠

十二月宋遣試禮部尚書王信明州觀察使吳瓌賀萬

春節 此賀正旦使非賀生辰也使副姓名當書於

次年正月庚辰朔之下

二十六年八月以益都尹崇浩 宋史作完顏老

二十七年三月宋遣試兵部尚書張淑春 淑春當作

叔椿

九月以河中尹田彥皋近侍局使宗室鶚殺虎爲賀宋生日使周必大思陵錄云副使完顏琥彥皋見任河中尹借吏部尚書

十一月以殿前左副都點檢崇安翰林侍講學士兼御史中丞李宴爲賀宋正旦使思陵錄稱使鎮國上將軍兵部尚書元顏宗卞副使中議大夫祕書少監李宴元顏卽完顏避欽宗嫌名改完爲元也

十二月宋敷文閣學士韋璞鄂州觀察使特立特立上脫姜字

二十八年正月丁酉朔宜州觀察使趙不違 思陵錄

作趙不違

九月以武安軍節度使王克溫近侍局使鶻殺虎爲賀
宋生日使 思陵錄云中奉大夫禮部尚書王克溫
廣威將軍客省使元顏琬

十一月以河中尹田彥皋吏部侍郎移刺仲方爲賀宋
正旦使 思陵錄云中奉大夫吏部尚書田彥皋廣
威將軍戶部郎中耶律仲方

二十九年四月宋葛廷瑞趙不慢等來弔祭 宋史作
諸葛廷瑞

五月遣東北路招討使溫迪罕速可等使宋賀卽位

宋史作溫迪罕肅又據宋史是歲金遣張萬公等來致遺留物遣徒單鑑等來告卽位表皆失書

明昌六年十一月遣刑部尚書紇石烈貞等
宋史貞作正避仁宗諱也

承安二年正月宋試禮部尚書趙介利州觀察使朱龜年以母喪告哀按宋寧宗母李氏以慶元六年崩卽金承安五年也表殆因次年告曾祖母喪事而致誤耳趙介朱龜年二人與次年告哀使正同其誤顯然又按宋史是年金遣奧屯忠孝來賀明年正旦此

表失書

年八月宋試刑部尚書湯碩福州觀察使李汝翼等
報謝 按宋史是歲金遣烏林荅天益來弔祭此表
但有宋報謝使而無弔祭使蓋脫文

九月宋顯謨閣學士王休 宋史作楊王休此脫楊字
泰和元年十一月遣殿前右衛將軍紇石烈七斤等

宋史作紇石烈眞

二年十一月遣武安軍節度使公弼等 宋史作徒單
公弼

三年九月遣刑部尚書承暉等 宋史作完顏奔

七年

宋開禧三年也

據宋史是歲六月以林拱辰爲金國通

謝使遣富瑄使金告哀

時太皇太后謝氏崩

劉黼正賀金主生

辰表皆不書蓋其時以和議未定不得達也

八年 是歲宋遣曾從龍使金賀明年正旦聞金章宗

之喪改命從龍充弔祭使又遣宇文紹彭使金賀卽

位金遣裴滿正來告哀又遣蒲察知剛致遺留物又

遣使告卽位表皆失書蓋衛紹王無實錄史臣失於

采訪也

大安元年八月宋使賀萬秋節 正使俞應符按大安

元年二年崇慶元年金遣使賀宋生日及明年正旦

俱載宋史而失書使臣姓名惟大安三年有賀正使而無生辰使

二年八月宋使賀萬秋節 正使黃中

三年正月乙酉朔宋使賀正旦 正使錢仲彪是歲宋遣余巖來賀生辰表亦失書

崇慶元年正月宋使賀正旦 正使程卓是歲宋遣傅誠賀金生辰

至寧元年 是歲宋使賀正旦表失書正使乃應武也其秋宋遣董居義賀金生辰以國亂不至而還

貞祐元年 卽至寧元年 十一月宋賀正旦使入境 正使李

稟按此年及二年均有賀宋正旦使見於宋史而表闕之

后妃傳

海陵諸嬖 元好問中州集載賈左丞益謙言世宗大定三十年禁近能暴海陵蟄惡者得美仕史官修實錄誣其淫毒很驚遺臭無窮自今觀之百可一信邪及觀世宗紀大定八年上謂宰臣曰海陵時修起居注不任直臣故所書多不實可訪求得實詳而錄之孟浩傳亦載此事然則海陵事迹多出於訪聞中韓之言不如是之甚也大批蒙業而安者務飾先世之

美廢昏而立者好談前人之惡然公論自在古今難以一人手掩天下目也海陵之惡極矣世宗取之固無慚德乃必假細人之言以增成其醜斯亦心勞而拙矣益謙洵古之遺直哉

章宗元妃李氏 詔曰朕之內人見有娠者兩位如其中有男當立爲儲貳如皆是男子擇可立者立之

按金史列傳之重出者如章宗內人范氏胎損奉御賈氏詐稱有娠事一見於后妃傳再見於衛王紀三見於僕散端傳宣宗王皇后夢勾者數萬踵其後遂敕京城設粥施冰藥一見於五行志再見於后妃傳

寶符李氏北行自縊一見於后妃傳再見於列女傳

張汝弼妻高氏

卽高
仲幹

畫鎬王永中母像祈福被誅一

見於永中傳再見於汝弼傳明德皇后之葬元妃張氏
氏柩先行永中令執黃繖者前導及后柩至呼執繖者不應張僅言欲奏其事顯宗止之一見於顯宗紀
再見於永中傳孟鑄劾紇石烈執中貪殘縱恣且言
明天子在上豈容有跋扈之臣一見於鑄傳再見於
執中傳張行信奏朝廷括糧失民心又言奧屯忠孝
飾詐不忠一見於忠孝傳再見於行信傳路鐸言董
師中張萬公優劣及胥持國不宜再相一見於鐸傳

再見於持國傳完顏素蘭請屏左右言事一見於素

蘭傳再見於高琪傳

兩傳重複
幾五百言

烏林荅贊謀被誣事

一見於溫敦思忠傳再見於秉德傳正隆五年地震
馬貴中言命令嚴急所致一見於五行志再見於貴
中傳大定策試進士於憫忠寺夜半聞音樂聲一見
於五行志再見於選舉志

習不失傳

習不失本作辭不失後定爲習不失 按譯音本無定

字辭習聲相近紀載異詞各就語音近似譯之耳世
紀禮志宗室表諸篇皆書辭不失何嘗定作習字

石土門傳

石土門漢字一作神徒門 按石土門亦漢字也石土

神徒譯音有重輕耳思敬傳又作神土憊

子習失 亦作習室又作辭不失

思敬傳

本名撒改押懶河人金源郡王神土憊之子辭不失弟

也 此辭不失卽石土門傳之習失與昭祖之孫辭

不失

本傳稱習不失者

各是一人石土門傳已書耶懶路完

顏部人此又書押懶河人亦重出也

晏傳

攷異

金史二

六

本名幹論景祖之孫阿离合邁次子也 此傳卽在阿
离合邁之後何須更著其世系

宗寧傳

系出景祖太尉阿里合邁之孫 阿里合邁傳不云贈
太尉

宗道傳

太尉訛論之少子 表作幹論卽晏也訛幹聲相近幹
离不禮志作訛魯補

承安二年爲賀宋正旦使 交聘表作完顏崇道蓋避
顯宗諱改宗爲崇

阿鄰傳

上卽位於遼陽 當云世宗此稱上者因實錄之文未

及更正

按荅海傳

以猛安讓兄子喚端 宗雄傳作桓端

宗翰傳

宗翰 金國志繫年錄皆作宗維

本名粘沒喝漢語訛爲粘罕 按國語解粘罕心也譯

音有輕重史臣遂以爲訛

蒲家奴宗翰魯宗翰宗磐副之 宗翰字重複上翰字

當爲幹之謫魯字疑衍

遂會睿宗于濮 紀傳多稱宗輔惟宗翰阿离補未蓋
輝傳稱廟號

宗翰朝京師謂宗幹曰儲嗣虛位頗久合刺先帝嫡孫
當立不早定之恐授非其人宗翰日夜未嘗忘此遂
與宗幹希定議入言於太宗請之再三乃從之

此事又見熙宗紀

熙宗卽位拜太保尚書令領三省事封晉國王乞致仕
詔不許天會十四年薨 按金國志天會十三年封
左副元帥粘罕晉國王領三省事除元帥府左監軍

兀室

兀室一作悟室
卽完顏希尹也

尚書左丞相二帥乃金主所忌

故以相位易兵柄是時劉豫有侵江之請窩里溫行

窩里溫卽宗輔世宗之父也金史作訛
里朵紀稱薨於天會十三年與此不合則二帥兵柄

已去矣除知燕京樞密院事韓企先尚書右丞相西

京留守高慶裔尚書左丞蕭慶尚書右丞二人皆粘

罕腹心故不欲用之於外十五年春左丞高慶裔以

賊下大理寺慶裔乃粘罕腹心宗磐之徒欲挫粘罕

故先折其羽翼也夏粘罕乞免官爲庶人贖慶裔之

罪國主不許斬慶裔於會寧市臨刑粘罕哭別之慶

裔曰我公早聽某言豈至於今日我今歿耳我公其

善保之以此知慶裔嘗教粘罕反也時山西路轉運使劉思肅州防禦使李興麟河東北路轉運使趙溫訊坐慶裔下獄思伏誅興麟杖脊爲民溫訊值改元赦得免其餘連坐甚衆皆粘罕之爪牙粘罕自是失勢矣安得不憤悶而歿繫年錄亦載宗維卒於十五年獨金史熙宗紀及此傳以爲十四年薨未詳孰是宗翰以失兵柄憤恚而死傳雖諱而不言然入相以後卽有致仕之請其不樂居內可知徐夢莘紀粘罕獄中上書及金人誅粘罕詔出於傳聞或未可信要其晚年失勢則誠非無稽之言也

宗望傳

宗望 繫年錄作宗傑

張邦昌傳

張邦昌宋史有傳 按張邦昌劉豫王倫字文虛中皆宋史有傳邦昌雖爲金人所立旋即返正終爲宋所殺略見其事於宗翰傳可矣不必更爲立傳且邦昌事與宗弼無涉乃與劉豫並附於宗弼之後殊非其次王倫以宋臣奉使始終不受金職與虛中之仕金通顯者有別虛中宜入金史倫宜入宋史不必兩見也

劉彥宗傳

遼太宗入汴載路車法服石經以歸 按漢魏之石經在洛陽唐之石經在京兆汴都無石經也汴都石經宋嘉祐所刻在遼入汴以後彥宗所云殊未足信或云石經當是石鼓之譌

施宜生傳

其副使耶律闢離刺 交聘表作闢里刺

王倫傳

皇統元年宋人請和三年二月宋端明殿學士何鑄容州觀察使曹勛進誓表 按交聘表何鑄等進誓表

在皇統二年

三月遣左副點檢賽里山東西路都轉運使劉綯送天水郡王喪柩及宋帝母韋氏表不見二使臣名

熙宗二子傳

熙宗諸子 按太祖太宗世宗諸子傳皆各爲卷宗望宗弼以功大別立傳不附于太祖諸子之次允合史例熙宗海陵顯宗衛紹王宣宗諸子則以事迹太少不能成卷或列於諸臣之前或殿於諸臣之末雖論贊各殊而總在一卷之中編次終覺非法若以熙宗海陵諸子續于太宗諸子之末顯宗衛紹王宣宗諸

子續於世宗諸子之末豈不有條有理乎

阿离補傳

宗室子系出景祖 宗室表不見阿离補名

耨盪溫敦思忠傳

耨盪溫敦思忠 按百官志溫敦與耨盪各是一姓據

此傳則是四字姓矣熙宗紀稱溫都思忠敦與都聲
相近也海陵紀前稱溫敦思忠或稱溫都思忠後稱
耨盪溫敦思忠逆臣秉德傳亦稱溫敦思忠

是時贊謨爲行臺參知政事思忠黷貨無狀贊謨鄙之
兩人由是交惡海陵殺左丞相秉德于行臺贊謨妻

秉德乳母也思忠因構謨

當作贊謨脫贊字

殺之

此卽上

文所云烏林荅贊謀也謀謨聲雖相近但一篇之中不應互異此事亦見秉德傳當去彼存此

天德三年致仕 海陵紀思忠以貞元元年十一月致仕

鎬王永中傳

貞祐三年太康縣人劉全嘗爲盜亾入衛眞界詭稱愛王所謂愛王指石古乃石古乃實未嘗有王封小人妄以此目之 按愛王事見於金國志甚詳云明昌五年正月大通節度使愛王大辨據五國城以叛大

辨鄭王允蹈之子也允蹈二子大辨居長年十六明
斷果決封遂寧郡王明昌初遷愛王會蒙人累寇邊
大臣議遣親王統兵鎮撫大辨請行世宗以其年幼
不許完顏赤曰愛王雖年少然志氣明決度必可任
遂遣之至鎮大得諸夷之心及允蹈誅其奴樵夫者
急遣人往報愛王使爲備愛王爲父發哀調發上國
兵七萬人爲城守計三路提點万俟兀馳驛奏愛王
叛國主遣皇弟東安王瑜武定王瑤將兵五萬往攻
之至桑乾川遇愛王將骨孛興與戰河北兵大敗瑜
僅以身免三月大起兵命東安王瑜完顏進等分路

攻討約會於五國城掌書記何大雅說愛王曰主上以君討臣今茲之來勢頭甚重萬一戰而不捷後將誰繼不如求援於大朝爲討之愛王許諾遣大雅往聘約以其子雄爲質破國之後軍儲金帛爲其所取許之五月完顏進等兵至東堙骨孛興戰敗退保五樓城進追至城下愛王見勢急留其子雄守城自往北路至平天漠而大朝將兵已至愛王大喜以手指天下馬與大朝首將稽首相見奉獻金寶十車首將喜曰大王無慮侍郎與戰北人言我爲郎也兵至五樓進等與戰北人禿體大撻以入以一當百進兵大

敗乘勝襲遂至和龍東津承安四年時國兵屢敗愛
王處和龍以北凡國家始興之地皆失之五年北軍
渡入至斯波川和龍帥完顏太康集兵禦之大兵長
驅而前愛王兵與之合十二月丁酉朔陷大都城圍
和龍太康之兵皆潰二十九日和龍陷遂取東灤平
三州泰和四年愛王歿其子雄三大王立大將共戍
其國且約以進兵雄以父喪辭大將怒遣其掌文官
顏飛責讓之初愛王定約以國家初起之地及故遼
封疆自溝內以北歸之於北溝南則爲己有累歲結
謀用兵愛王無分毫得也至是使來責之雄畏懼而

從十二月葬父愛王於冷山遂進兵愛王父子稱兵
事不載於史且據金志愛王爲鄭王永蹈之子而史
以爲錫王永中子亦不相合又明昌五年歲在甲寅
其時元太祖尚未建元所謂大朝者又何所指乎然
金自明昌以後北邊實有用兵之事據章宗紀明昌
五年九月命上京等九路選軍三萬俟來春調發仍
命諸路并北阻鞅以六年夏會兵臨潢六年五月命
左丞相夾谷清臣行省事於臨潢府六月左丞相清
臣遣使來獻捷七月行省都事獨吉永中來報捷十
月命尚書左丞夾谷衡行省于撫州十一月左丞相

夾谷清臣罷右丞相襲代領行省事承安元年正月
大鹽澤羣牧使移刺覲等爲廣吉刺部所敗歿之十
一月詔選親軍八百人戍撫州命左丞相襲行省於北
京簽書樞密院事完顏匡行院事於撫州十一月特
補羣牧契丹陁鎖德壽反泰州軍擊敗之十二月遣
李仁惠勞賜北邊將士二年三月以參知政事裔代
左丞相襲行省於北京五月北京行省參知政事裔
移駐臨潢府八月以邊事未寧詔集六品以上官於
尚書省問攻守之計九月遣官分詣上京東京北京
咸平臨潢西京等路招募漢軍九月以樞密使兼平

章政事襄行省於北京三年十一月樞密使兼平章政事襄至自軍中此五年中叛者何人史皆不書其姓名及行省還朝又不言斬獲克復之事且其用兵正在永蹈被誅之後一年則愛王事或果有之但其時助之者非蒙古耳又據夾谷清臣傳但云密受命出師內族襄傳但云邊事急俱不言首難之人其諸部從亂者則有阻鞞有胡正弘有特滿大約契丹舊部金志指爲大朝則非其實矣金史雖諱其事然以此傳所載推之必實有愛王倡亂北邊久之病歿故內地姦人亦假其名如陳勝詐稱公子扶蘇之事且

曰愛王終當奮發則其事誠不可掩也

紇石烈志寧傳

是時宋得窩斡黨人括里札八用其謀攻靈壁虹縣都統奚撻不也叛入於宋撻不也宋史稱爲蕭琦蓋宋朝賜名

紇石烈良弼傳

追封金源郡王按百官志紇石烈徒單姓皆封廣平郡今攷諸傳如紇石烈良弼追封金源郡王徒單克寧封延安東平郡王與志皆不合

劉瑋傳

唐盧龍節度使仁敬之裔 仁敬卽仁恭史臣避金諱
追改

完顏匡傳

章宗崩匡受遺詔立衛紹王 章宗遺詔當載於衛紹

王紀不宜入匡傳

賈益謙傳

字彥亨 中州集作亨甫

完顏奴申傳

奉使大元至龍駒河 龍駒河卽元史之龍居河也長
春西游記謂之陸局河

上以東面元帥李辛跋扈 歸潛志作李新

餘見崔立傳 按崔立賣國逞兇貫盈自斃置之叛臣
夫復何辭史臣既以忌諱不敢斥言則附其事於奴
申傳足矣不當爲專傳以獎亂也

祁字京叔渾源人 按文苑劉從益傳末已附載祁事
此引祁語而復言其字與籍貫何也李獻能亦在文
苑傳而徒單兀典傳又言獻能字欽叔貞祐三年進
士其複沓多此類

崔立傳

是日御史大夫裴滿阿忽帶諫議大夫左右司郎中烏

古孫奴申左副點檢完顏阿散奉御忙哥講議蒲察
琦戶部尚書完顏珠顆皆歿 按歸潛志立變三日
御史大夫裴滿阿虎帶提點近侍局兼左右司郎中
吾古孫訥申縊於臺中戶部尚書完顏仲平亦自殺
仲平卽珠顆一人而兩名也虎與忽烏與吾奴與訥北音皆相似忠義
傳言諸人歿在崔立變之明日歸潛志則以爲後三
日非卽在此日明矣忠義固人所樂道然此諸人者
旣詳見於忠義傳又見於哀宗紀而此傳又一一舉
之無怪乎汗青無日也

聞安國納一都尉夫人 歸潛志云取故監軍王守玉

妻

徒單兀典傳

不知其所始

按宣宗紀貞祐三年遙授武寧軍節度

副使徒單吾典告抹撚盡忠逆謀

亦見盡忠傳

當卽其人

也北音吾與兀相似

石蓋女魯歡傳

正大九年二月

按哀宗以是年正月十八日

據歸志改

元開興四月又改天興則二月以後不得稱正大矣

傳旣不書改元天興則下文二年字亦不可通

二月戊辰朔

按哀宗紀是年二月丙子朔非戊辰朔

其三月戊辰官奴攻殺馬用戊辰亦非朔日也傳誤
時青傳

初與叔父全俱爲紅襖賊 按青本紅襖賊招降未久
卽逃入宋不足立傳

忠義傳

完顏陳和尚 六年有衛州之勝八年有倒回谷之勝

按衛州解圍事在正大七年十月此云六年者誤
倒回谷之事本紀不載唯完顏合達傳云八年正月
北帥攻破小關殘盧氏朱陽潼關總帥求救於二省
省以陳和尚忠孝軍千人往應北軍退追至谷口而

還所云谷卽倒回谷也

酷吏傳

金史多闕逸據其舊錄得二人焉 按金史酷吏宦者皆止二人不能成卷乃以酷吏與佞幸同卷宦者與方技同卷編次亦覺未當愚謂高閭山歿於國事可掩其酷刑之罪則酷吏傳可省也金之近侍局皆世家子弟爲之宦寺無預政者則宦者傳可省也宦者二人梁琬當附佞幸傳宋珪與奉御絳山等同歿當附見忠義傳

佞幸傳

張仲軻 宋余康弼賀登寶位 康當作唐

貞元二年正月宋正旦使施臣朝辭 臣當作鉅攷宋
史是歲賀正旦使吳卓鉅乃生辰使也

列女傳

李英妻張氏 按列女二十一人李寶符已載於后妃
傳不當重出若李英妻張氏撤合輦妻獨吉氏胡土
門妻烏古論氏完顏素蘭妻完顏仲德妻自可附其
夫傳馮妙真聶舜英自可附其父傳史家必分而列
之識迂而詞亦贅矣

逆臣傳

言本名烏帶 臣本以言本名三字屬於唐括辯傳之
末而以烏帶提行可笑之甚

叛臣傳

張覺 子僅言 按僅言仕世宗朝無大過咎不當附
叛臣篇

西夏傳

德旺或嗣立者史失其名 據宋史嗣立者清平郡王
之子南平王覲也兩史總裁出一手而不同若此

金國語解

姓氏 按百官志所載白號黑號之姓甚多今譯爲漢

姓者僅三十有一移刺石抹則契丹人也不當入女直姓氏之內

金史二終

元

廿二史攷異八十六

錢大昕學

太祖紀

姓奇渥溫氏 按元祕史作孛兒只吉歹氏明楊子器

元宮詞注亦云世祖姓孛兒只斤只斤卽只吉歹譯

音有輕重今譯爲博爾濟吉特

遂有娠產一子卽孛端义兒也 按陳桱通鑑續編天

后阿蘭寡居一乳三子長曰孛完合荅吉卽史所謂博寒葛荅

黑也祕史作次曰孛合撒赤卽史所謂博合親撒里

不忽合荅吉勒季曰孛敦察兒卽孛端义兒祕史亦云阿蘭豁

阿即阿爾

嫁朵奔篋兒干

即脫奔咩哩健

生二子既寡居又

生三子曰不忽合答吉日不合禿撒勒吉日孛端察兒史獨以孛端義兒爲夫亡後所生而以博寒葛答黑二人當脫奔咩哩健之二子非其實也帝王之興必有殊異一乳三子之說宜若可信

自統急里忽魯之野 祕史作統格黎克豁羅罕豁羅罕者小河也

子葛不律寒嗣 祕史作合不勒合罕合罕猶言可汗也元之先世部衆未盛至葛不律始自稱合罕葛不律卒遺言以叔父之子俺巴孩合罕代領其衆是爲

泰赤烏氏

汪罕子亦刺合 祕史作你勒合亦稱桑昆者蓋沿遼
金時詳袞之稱是號非名也木微台傳作鮮昆忠義
傳作先髡譯音有輕重其實一爾

哈荅斤部散只兀部朶魯班部塔塔兒部宏吉刺部聞
乃蠻泰赤烏敗皆畏威不自安會於阿雷泉斬白馬
爲誓欲襲帝及汪罕 按下文又云宏吉刺歸札木
合部與朶魯班亦乞列思哈荅斤火魯刺思塔塔兒
散只兀諸部會于健河共立札木合爲局兒罕盟于
禿律別兒河岸所列諸部之名惟多亦乞列思火魯

刺思二種餘多相同攷祕史此時從札木合者實有
十一部立札木合者以拒王罕與太祖也史誤分爲
兩事而諸部之名亦多脫漏且乃蠻泰赤烏之敗乃
在札木合等散去之後紀所書皆非其實

宏吉刺部長迭夷 迭夷疑卽特薛禪也迭特聲相近

與帝麾下抄吾兒連姻 列傳第十卷有召烈台一作臺

抄兀兒卽其人也兀吾聲相近召烈台蓋其族姓

歲癸丑汪罕父子謀欲害帝 癸丑當作癸亥

國人乞力失 當作乞失力哈刺哈孫傳作啟昔禮聲
相近也祕史作乞失力黑

虜宏吉刺別部溺兒斤以行 祕史作帖兒格

至班朱尼河 祕史作巴勒渚納渚兒納渚兒者海子

也亦作 元史或作班米居河又作辨屯河又稱黑河

言其水渾也

謀於白達達部主阿刺忽思 卽阿刺忽思剔吉忽里

也白達達部本傳作汪古部

元年兩初金殺帝宗親咸補海罕 咸補海卽俺巴孩

也祕史俺巴孩以女嫁塔塔兒部親送至兀兒失溫

河爲塔塔兒所執送之金金人殺之諸部復立合不

勒子忽圖刺爲合罕

三年^{戊辰}冬再征脫脫及屈出律罕 据祕史征脫脫及

屈出律事在乙丑歲

時幹亦剌部等遇我前鋒不戰而降因用爲向导 按
祕史太祖二年皇子朮赤將右手軍出征幹亦剌部
人忽都哈別乞不戰而降卽以爲鄉導征幹亦剌禿
巴思諸部皆下之此與征蔑里乞事無涉史繫于征
脫脫之後非也

六年^{辛未}西域哈刺魯部主阿昔蘭罕來降畏吾兒國主

亦都護來覲 此二事祕史載在元年

耶律阿海降入見帝于行在 按本傳阿海及弟禿花

俱與太祖同飲辨屯河水金人訝其使久不還拘阿
海家屬皆在太祖未卽位之前其後從左帥闊別略
地漢南破烏沙堡阿海咸在行間紀于是年十月書
阿海降非也

劉伯林夾谷長哥等來降 按劉伯林傳來降在壬申
歲與此差一年

八年^{癸酉}金西京留守忽沙虎 金史作胡沙虎卽紇石
烈執中也

拙赤解薄剌爲左軍 拙赤解卽朮赤台

史天倪蕭勃迭率衆來降朮華黎承制並以爲萬戶

按天倪傳亦云以萬戶統諸降卒而石抹孛迭兒傳
卽蕭勃迭但云擢爲千戶兩傳互異攷元初萬戶爲軍官

最要之職太祖時惟木華黎博爾朮爲左右萬戶納
牙爲中軍萬戶此外雖蒙古世臣亦不輕授天倪輩
漢人初附豈得便居此職則石抹傳云擢千戶者似
爲近之然此條沿譌亦非無因攷張匡衍撰木華黎
行錄云史天倪蕭勃迭率衆來降王奏各統萬戶其
云各統萬戶者謂令其領萬人從征耳非授以萬戶
之職也史臣昧於官制遂以爲真授萬戶矣元制除
萬戶未有不賜金虎符者今據天倪傳是年已爲萬

戶至甲戌始賜金符乙亥授副都元帥乃改賜金虎符則其初降必未授萬戶也史氏之授萬戶始於天澤蓋在太宗卽位之初予嘗見崔鉉撰史氏慶源碑稱天倪曰河北西路都元帥稱天澤曰真定五路萬戶則天倪之非萬戶審矣

九年

甲戌

木華黎征遼東

趙天爵名臣事略作遼西此

誤

戈宙襄曰木華黎傳亦誤作遼東

十年

乙亥

四月詔張鯨總北京十提控兵從南征鯨謀叛

伏誅鯨弟致遂據錦州僭號漢興皇帝

按史進道

神道碑丙子錦州渠帥張致叛丁丑從王提大軍攻

拔之張致伏誅此紀書張致叛於乙亥討平於丙子
皆差一年蓋沿元明善所撰木華黎世家之誤當以
碑爲據史樞傳父天安丁丑從討叛人張致平之正
與碑合何實王珣傳俱以致叛繫之丙子歲惟珣傳
稱誅致卽在是年稍有不合耳

吾也而傳云十一年亦卽丙子也

八月木華黎遣史進道等攻廣寧府降之 監本史或
作賜者誤也據進道碑丁丑張致伏誅王又令公招
收廣寧府兵及城下開門迎降此亦丁丑年事廣寧
與錦州接壤故因平張致而并降之也紀所書年月
多未可信進道字道遠天倪父秉直之弟癸酉十一

月與秉直同降從木華黎下山東甲戌三月還師圍中都八月進兵圍守北京乙亥三月城降八月進兵攻興州趙守玉望風送款以勲授義州節度使命管領北京勾當丁丑從大軍攻錦州拔之及廣寧府降就命留守廣寧未幾復命留守北京在北京十有餘年甲午薦其婿北京管民長官張之翼自代又十年卒史不爲進道立傳今據段紹先所撰碑敘次之以備攷

十三年

戊寅

是年伐西夏圍其王城夏主李遵頊出走西

涼

按陳桺通鑑續編薛應旂通鑑皆在十二年今

攷金史宣宗紀興定二年正月陝西行省獲歸國人
言大元兵圍夏王城李遵項命其子居守而出守西
涼興定二年卽戊寅歲也金人于正月傳聞得之則
通鑑云在前年者爲是

命哈眞禮刺率師平之 禮當作札

十六年

辛巳

帝攻卜哈兒薛迷思干等城

薛迷思干卽

尋思干也一作邪迷思干攻上年五月己書克尋思
干城矣何以此春又書攻下之豈克而又叛乎抑史
文重出乎

金東平行省事忙古 金史作蒙古綱

宋漣水忠義統轄石珪率衆來降 宋史在嘉定十三年十二月元太祖之十五年也石珪傳亦在庚辰年惟木華黎傳與本紀合

宋京東安撫使張琳 宋史作張林林之叛宋據宋史寧宗紀在嘉定十四年十一月即太祖辛巳歲與紀正合而李全傳繫之十五年恐全傳誤

十八年癸未十月金主珣殂子守緒立 金史在十二月二十年乙酉二月董俊判官李全亦以中山叛 此別一

李全非據青州之李全也據董俊傳全之叛在庚辰歲相距五六年紀移於此殆因次年有李全執張琳

郡王帶孫園全益都事而牽連及之是誤仍兩李全爲一人也

二十一年 此下當有丙戌二字傳寫脫之

九月李全執張琳 據宋史李全傳全逐張林入青州在嘉定十五年壬午至是年丙戌全之據益都已四年矣而李魯傳稱丙戌李全陷益執元帥張琳送楚州誤也紀但稱執琳不云陷益起或壬午歲琳棄州走至此時始見執乎

十二月李全降 據李魯傳全之降在丁亥三月李全傳亦在寶慶三年四月

卽丁亥歲 紀誤書於前一年

二十二年丁亥德順節度使愛申進士馬肩龍死焉 此
二人金之忠臣金史已列諸忠義傳矣於元家何與
而更書之邪且金臣死於元者又不止此二人也史
家昧於限斷之例故有此失

太宗紀

諱窩閣台 祕史作幹歌反陳桎續編作幹可反石刻
或作月古台

二年庚寅十一月始置十路徵收課稅使 陳桎續編在
二月

三年辛卯二月克鳳翔攻洛陽河中諸城皆下之 據金

史鳳翔之陷在四月非二月也下文云十月帝圍河中十二月拔之則此時不應有攻下河中事

五年

癸巳

正月庚申金主守緒奔歸德 金史作己未先

一日

四月崔立以金太后王氏后徒單氏及荆王從恪梁王守純等至軍中速不台遣送行在 任大椿云按金史哀宗紀及劉祁歸潛志荆王梁王皆遇害于青城其北遷者止兩宮耳此紀所載似二王亦與兩宮同送行在矣又金史作梁王從恪荆王守純此稱荆王從恪梁王守純或傳寫之誤

六年

甲午

議自將伐宋 按是春伐金之役與宋合攻金

亡之後與宋約和以陳蔡東南爲宋西北爲蒙古各
引兵還矣乃宋相鄭清之忽主收復二京之議遣全
子才等率淮西兵萬餘人以六月出師七月二日抵
汴行省李伯淵以書來降五日殺崔立率父老出迎
子才遂入汴而趙文仲以淮東師五萬繼至乃遣徐
敏子爲監軍西上二十八日入洛陽元戌兵先期空
城而去矣宋兵糧盡不能守引還八月二日元兵追
擊之大敗敏子中流矢徒步間行由浮光遁子才在
汴聞洛東喪師亦於二十五日棄城遁此元太宗所

以有自將伐宋之議也紀於分地約和及宋背約北
侵事俱不之及則議伐宋爲無名矣

國王查老溫 卽木華黎之孫塔思也

入年

丙申

二月命應州郭勝鈞州李木魯九住鄧州趙祥

從曲出充先鋒伐宋 按郭勝等三人史皆無傳唯

姚燧撰鄧州長官趙公神道碑於祥事頗詳祥字天

麟蔡之平與人金天興癸巳天兵圍蔡城中糧絕公

率部曲發富室藏粟突圍上餽授提控明年甲午金

亾將麾下歸宋授信效左軍統制遣戍鄧州乙未十

月天兵略地漢上開門納降居兩月太子南征

卽曲出也

還過教以是城甚近襄陽虞力孤不能自完且歲荒
與均唐三州民徙洛陽之西三縣鄧治長水均治永
寧唐治福昌許公權宜行省事乃先勞分苦佐乏藥
疾府寺田廬於粲一始丙申襄樊亦徙洛陽其年入
覲特賜金符錦衣許出戰督軍入守字民別降銀符
八十金符八以酬從公將佐同力者蓋祥降元以後
卽徙治內地別無從曲出伐宋之事元初不立史官
後來修實錄者大約道聽塗說十不存一故太祖四
朝紀大率䟽舛無可徵信

七月詔以真定民戶奉太后湯沐 按食貨志睿宗子

阿里不哥大王位丙申年分撥真定路八萬戶蓋太
后湯沐之邑後爲睿宗所有

中原諸州民戶分賜諸王貴戚幹魯朶拔都平陽府

食貨志朶赤大王位分撥平陽四萬一千三百二戶
拔都者朶赤之子

茶合帶太原府 食貨志茶合帶大王位分撥太原四
萬七千七百三十戶茶合帶者太祖第二子察合台
也世祖紀太原乃阿只吉分地阿只吉卽察合台之
孫

古與大名府 食貨志太宗子定宗位分撥大名六萬

八千五百九十三戶定宗名貴由此作古與聲相近
李魯帶邢州 食貨志入荅子丙申年分撥順德路一
萬四千八十七戶順德路卽邢州則李魯帶疑卽入
荅子矣世祖紀邢州有兩荅刺罕其一爲啟昔禮卽
哈刺哈孫之大父其一則太祖紀所謂把帶卽八荅
子也或云啟昔禮之子名博理察與李魯帶聲亦相
近

果魯干河間府 食貨志闕列堅太子子河間王位分
撥河間路四萬五千九百三十戶果魯干卽闕列堅
也

李魯古帶廣寧府 食貨志李羅古斛子廣寧王位丙申年分撥恩州一萬一千六百三戶此云廣寧府疑志誤李魯古帶卽別里古台

野苦益都濟南二府戶內撥賜 食貨志撈只哈撒兒大王子淄川王位分撥般陽路二萬四千四百九十三戶淄川王名也苦卽野苦

按赤帶濱棣州 食貨志哈赤溫大王子濟南王位分撥濟南路五萬五千二百戶濟南王名按只吉歹卽按赤帶也

幹陳那顏平灤州 食貨志幹真那顏位分撥益都等

處六萬二千一百五十六戶按幹陳卽幹赤斤其後
爲遼王則紀云平濠者爲得其實

皇子闕端 食貨志闕端太子位分撥東京路四萬七
千七百四十一戶東京蓋東平之譌元典章有東昌
路達魯花赤撥馬赤前去永昌府將軍糧交付了當
云云則東昌乃闕端太子分地元初其地隸東平行
省也

駙馬赤苦 公主表鄆國公主位禿滿倫公主適赤窟
駙馬卽此赤苦也食貨志鄆國公主位丙申年分撥
濮州三萬戶

公主阿刺海 公主表趙國大長公主阿刺海別吉適

趙武毅王孛要合食貨志趙國公主位分撥高唐州
二萬戶

公主果真 公主表昌忠武王孛禿繼室以太祖女昌
國大長公主火臣別吉火臣卽果真也食貨志昌國
公主位分一萬二千六百五十二戶失書地名

國王查刺溫 食貨志木華黎國王分撥東平三萬九
千一十九戶查刺溫卽木華黎之孫

茶合帶鍛真 按木赤台有孫端真拔都兒襲爵郡王
卽鍛真也高麗傳父守忠從段真郡王取中原有功食貨志木赤台郡王

丙申年分撥德州二萬戶茶合帶未詳何人恐是衍文

蒙古寒札 按畏荅兒之子忙哥封郡王疑卽蒙古也食貨志愠里荅兒薛禪丙申年分撥泰安州二萬戶愠里荅兒卽畏荅兒寒扎未詳

按赤那顏 按赤那顏卽國舅按陳那顏也食貨志魯國公主位丙申年分撥濟寧路三萬戶

圻那顏火斜木思並于東平府戶內撥賜 圻當是圻字之譌哲別以驍勇事太祖與虎必來者勒篋速不台稱四先鋒紀傳或書遮別或書者別郭寶玉傳作

柘柏吾也而傳稱折不那演巴而木阿而忒的斤傳
稱者必那演實一人也食貨志和斜漫兩投下一千
二百戶丙申年分撥曹州一萬戶和斜漫卽火斜木
思也而圻那顏則志遺之又按志所載丙申年分撥
者尙有太祖叔荅里真官人火雷公主孛羅先鋒行
丑兒乞里歹拔都笑乃帶先鋒帶孫郡王孛魯古妻
佟氏孛羅台萬戶忒木台駙馬幹濶烈闊里必合丹
大息千戶也速不花等四千戶也速兀兒等三千戶
帖柳兀禿千戶滅古赤塔思火兒赤折米思拔都兒
迭哥官人黃兀兒塔海添都虎兒紀俱不載

九年丁酉蒙哥征欽察部擒其酋八赤蠻按元史載征

欽察事紀志傳互異此紀及憲宗紀俱以八赤蠻爲

欽察之酋長地理志太宗甲午年命諸王拔都征西

域欽義

卽欽察

阿速幹羅思等國歲乙未亦命憲宗往

焉歲丁酉師至寬田吉思海傍欽義酋長八赤蠻逃

避海島中適值大風吹海水去而乾生擒八赤蠻亦

與本紀畧同而速不台傳則云歲己卯

太祖十四年

大軍

至蟾河與滅里吉遇盡降其衆其部主霍都奔欽察

速不台追之與欽察戰于玉峪敗之癸未

太祖十八年

速

不台請討欽察許之遂引兵繞寬定吉思海展轉至

太和嶺鑿石開道出其不意至則遇其酋長玉里吉及塔塔哈兒方聚于不租河縱兵奮擊其衆潰走矢及玉里吉子逃于休閑其奴來告而執之餘衆悉降遂收其境乙未太宗命諸王拔都西征入赤蠻命速不台爲先鋒與入赤蠻戰繼又令統大軍遂虜入赤蠻妻子于寬田吉思海入赤蠻逃入海中然則欽察與入赤蠻本是兩部速不台以太祖癸未平欽察太宗乙未走入赤蠻相距十有三年而憲宗擒入赤蠻在丁酉歲距欽察之平蓋已久矣土土哈傳太祖征蔑里乞卽滅里吉其主火都卽霍都奔欽察欽察國主亦納

思納之太祖命將往討亦納思已老國中大亂亦納思之子忽魯速蠻遣使自歸于太祖而憲宗受命帥師已扣其境忽魯速蠻之子班都察舉族迎降其敘被兵之由與速不台傳合而酋長之名彼此互異且速不台平欽察之時憲宗僅十六歲初無受命帥師之事而土土哈傳併而爲一益不然矣

壬寅年六皇后乃馬真氏始稱制

刊本六作太誤

按本紀不

書六皇后之名后妃表云脫列哥那六皇后乃馬真氏太宗崩后攝國陳桎通鑑續編云太宗崩六皇后禿里吉納治國事則脫列哥那禿里吉納本一人譯

音有輕重爾而后妃表別有禿納吉納六皇后疑是重出

乙巳年宋制置趙葵 當作趙葵

定宗紀

太宗長子也 按陳桎續編以爲第二子

定宗崩後議所立未決當是時已三歲無君 按后妃

傳云定宗后名幹兀立海迷失抱子失列門垂簾聽政者六

月陳桎續編則云皇太后禿里吉納復治國事未審誰是

憲宗紀

元年辛亥西方諸大將班里赤 疑卽巴而忒阿兒忒也

二年壬子合丹於別石八里地蔑里於干葉兒的石河海

都於海押立地別兒哥於曲兒只地脫脫於葉密立

地蒙哥都及太宗皇后乞里吉忽帖尼於擴端所居

地之西 按合丹蔑里表作滅里皆太宗之子海都者合

失之子脫脫者哈刺察兒之子蒙哥都者闊端之子

皆太宗孫也惟別兒哥不見於表擴端卽闊端乞里

吉忽帖尼所謂三皇后也據陳桎續編則所遷者乃

六皇后秃里吉納

四年甲寅會諸王於額額臘兒之西乃祭天於日月山

王禕日月山祀天頌日月山國語云阿剌溫山在和
林之北金史地理志西京路昌州寶山縣北五百餘
里有日月山大定二十年更曰抹白山此別是一山
名同而地異也

元史一終